

հան ձեռքով, որի կառուցած «յոյժ գեղեցիկ յօրինուածովք, գմբէթայարկ և եռախորան, հաստահեղոյս և տաշածոյ վիմօք» եկեղեցին ոգևորութեամբ նկարագրում է Սիսական նահանգի պատմագիրը³⁸։ Մեծամեծ կալվածքներով ապահովված այս վանքը, ուր հենց սկզբից հավաքվել էին «եղբարք սրբակրօն, ավելի քան 400», այնուհետև հատուկ հոգատարութեան առարկա դարձավ Կապանի և Բաղաբերդի տերերի կողմից։ Այստեղ վանահայր նստեց հիմնադրի՝ Զիվանշիր իշխանի որդին՝ Վահանը, որը հետո դարձավ Տաթևի եպիսկոպոս և մի կարճ ժամանակամիջոց՝ Հայոց կաթողիկոս։ Սա էլ նոր շենքերով փայլեցրեց մենաստանը. «...յետ բազում ժամանակաց յաւուրս Գրիգորի՝ թագաւորի Բաղաց, ի Շահանդիստոյ թագուհւոյն և ի Կայսայէ և ի Սենիքերիմայ թագաւորէ բազում և գեղեցիկ շինուածովք առավել գեղեցկացուցին զվանսն Վահանու»³⁹։ Այստեղ «հանգուցեալ կան ի շիրմի բազում թագաւորք և թագուհիք Աղվանից և Բաղաց, և բազում իշխանք փառաւորք Սիսական աշխարհիս»⁴⁰։

Վանքի ավերակները պահպանվել են Հալիձորի բերդից մեկ ու կես-երկու կիլոմետր դեպի արևմուտք, դեռ Կապան քաղաքին չհասած, Ողջի գետի նույն աջ ափին, մի խիտ անտառի մեջ։ Մի կածան այստեղ բաժանվում է դեպի հարավ գլխավոր ճանապարհից այն կետում, որն այժմ կոչվում է Չոր կամուրջ, հնում՝ Դուրու քաղրի, երևի հին կամրջի վայրում, որը այժմ փոխարինված է փայտե ձողապատ կամրջով։ Կառուցումների այժմյան վիճակը պարզ գաղափար է տալիս վաղեմի պլանի և ճարտարապետական մանրամասնությունների մասին։ Ամբողջ կոմպլեքսը տեղավորված է մի փոքրիկ հարթ հրապարակի վրա, որը երկու կողմից թեքված է դեպի ոչ խոր ձորակները, իսկ ետևից, որոշ հեռավորութեան վրա, վերջանում է սեպ բարձրացող ժայռերի ստորոտին։

Այդ վանքը իր ապահովութեան համար հույսը դրած է եղել ոչ այդ քարածայռերի դժվարամատչելիութեան, ոչ էլ հարևան ձորերի համեմատաբար փոքր խորութեան վրա։ Նա չի շրջապատել իր բազմանդամ միաբանությունն և կուտակած եկեղեցական սպասներն և այլ հարստությունները հաստահիմն պարիսպներով՝ ավերակների մեջ պարիսպների շարքերը չեն նշմարվում։ Նա վստահացել էր ձորի աշխարհիկ տերերի կառուցած ամրությունների սխտեմին. նրա պաշտպանությունը այդ կողմի իշխանական տան տոհմական պատվի գործ էր։

Այդ վստահությունը չունեին Սիսական նահանգի այլ խոշոր սրբավայրերը, որոնք այդ խառը ժամանակներում պետք է իրենք մտածեին իրենց ինքնապաշտպանութեան մասին, և ոչ միայն կրոնական առանձնարաններ էին, այլ վեր էին ածված ռազմական պաշտպանական կետերի, որոնց պարիսպների ետև կարող էին վտանգի ժամանակ ապաստան գտնել ոչ միայն միաբանությունը և նրա տնտեսութեան հետ կապված մարդիկ, այլև մերձակա գյուղերի բնակչությունը։ Այդպիսի ամուր պարիսպներով իրեն պատել է օրինակ՝ նույն Ողջի գետի ավազանում, Բեխ գյուղից արևելք, անտառների բարձր գոտում ձվարած Անապատը, որը տեղացիների լեզվով կոչվում է Արիստակէս։ Դրա

³⁸ Օրբէլեան Ստ., անդ., գլ. ԽԵ, էջ 239։

³⁹ Անդ., էջ 241։

⁴⁰ Անդ., էջ 240։